

COMUNICAZIUN DA PRESSA

5 e 6 gün 2010: 25 ons musica da giuventüna Engiadina Bassa

Quai chi ha cumanzà in Engiadina Bassa avant 25 ons cun entusiassem ma eir cun intschertezza po uossa verer inavo sün ün passà da success. Divers iniziants da la regiun han fundà la musica da giuventüna Engiadina Bassa (MGEB). Il böt da quists giuvens musicants es stat da promover la paschiun pella musica e da pisserar cha las differentas musicas da cumün survegnan musicants giuvens. Cumanzà ha la fatschenda cun raduond 20 musicants in l'età da 12 a 18 ons chi han miss la fundamainta per l'avegnir. Hozindi es la MGEB üna da las musicas da giuvenils solidas dal chantun e dombra sur ons üna commembranza da 60 musicantas e musicants. Ella spordscha als giuvenils da Samignun fin Zernez ün'occupaziun dal temp liber cun sen. Sia qualità musicala s'augmainta adüna darcheu da nouv.

L'istorgia da la MGEB ha raggiunt plüs success a festas da musica federalas e da giuvenils. Dal 1993 a Frauenfeld in occasiun da la festa federala da musicas da giuvenils es la MGEB gnüda terza illa terza categoria. Trais ons plü tard, a la festa federala ad Interlaken, ha quist success pudü gnir confermà: illa terza categoria cun daplü da 40 musicas ha raggiunt la MGEB l'ottavla piazza. Il plü grond success e punct culminant es dal sgür la partecipaziun a la festa federala da musicas da giuvenils dal 2003 a Cuaira. Per la prüma jada in sia istorgia ha sunà la MGEB illa categoria superiura ed ha muossà üna fich buna prestaziun. Id han segui diversas partecipaziuns a festas da musicas chantunalas e federalas. La MGEB ha implü survgni premis da recugnuschentscha sco'l „Premi cultural CRR“ o il premi da cultura dal Hotel Paradies da Ftan. Minch'on da prümvaira han lö duos concerts, adüna alternant in duos cumüns da l'Engiadina Bassa.

Als 5 e 6 da gün festagescha la MGEB illa halla da glatsch da Gurlaina a Scuol seis giubileum da 25 ons. Quista festa vain realisada in collavuraziun culla Lia Rumantscha e quai in connex cul program giubilar da 90 ons. Sonda saira vain dat il concert da gala al qual es invidada tuot la populaziun da l'Engiadina Bassa. Lura muossaran ils anteriurs musicants ch'els san amo sunar. La saira da concert vain conclüsa cun producziuns da tuot ils musicants reunits, anteriurs ed actuals. Davo ha lö il bal per giuven e vegl culla gruppa „Midnightladies“.

Per la festa da giubileum da dumengia s'han annunzchadas bod tuot las societats da musica da la regiun. Las festivitats cumainzan cul cortegi tras Scuol. I seguan lura ils differentes concerts da la societats da musica. L'act festiv es chosa da la MGEB. Davo divers pleds e plüssas onurificaziuns gnarà surdatta la bachetta al nouv dirigent.